

EHUko  uda ikastaroak

EHUk eta Eusko Ikaskuntzak elkarlana areagotuko dute

Bi erakundeek hitzarmena sinatu dute helburu komunak bideratzeko

Juan Jose Goiriena
EHUko errektoreak eta
Gregorio Monreal Eusko
Ikaskuntzako
lehendakariak hitzarmena
sinatu zuten atzo Donostian
«bi erakundeen
amankomuneko helburuak
hobeki bete daitezten, eta oro
har kulturaren eta
ikerikuntzen hedapen eta
ikeriketa ekimenak
erregulatu eta
errentabilizatzeko».

PERU C. SABAN / DONOSTIA

Atzo izenpetutako hitzarmenak bost urteko iraupena izango du eta ondoren beste bost urtez luza daiteke, bi erakundeek hala erabakitzen badute. Goirienak adierazi zuenez, «egiten ari garen elkarlana instituzionalizatu eta areagotzeko ekimena da». Bi erakundeek onurarako hitzarmena da atzokoa, «baina baita gure herrialdearentzat eta gure gizartearentzat ere».

Hitzarmenak hainbat atal ditu, bi erakundeek goi ikerketa zentro gisa elkar ezagutzea oinarritzat hartuta. Lehen puntuak zera dio: «Bi erakundeek ikerketaren alorreko lankidetzaren proiektu espezifikoa ahalbidetu eta garatuko dituzte, amankomuneko lerro bereziak indartuz eta elkarren berri emanez ikerketa-programazio orokorreari dagokienez».

Hitzarmen honen arabera,



Goirienak eta Monrealek sinatu zuten hitzarmena.

GILLENEA

besteak beste, aurrerantzean bi erakundeek beren ikerketa-ondarearen amankomuneko erabilera erraztuko diote elkarri. Zehazki, Eusko Ikaskuntzak bere Dokumentazio Zentroa praktikan diharduten EHUko ikasleentzako esku jarriko du.

Argitalpen alorrean bien arteko lankidetzaren sustatuko da euskal ikaskuntzei buruzko zientzia produkzioa zabaltzeko helburuarekin. Horrez gain, EHUk lagundu egingo du Eusko Ikaskuntzak duen unibertsitate arteko eta nazioarteko ikerketa Zentro aurreratu bi abiarazteko proiektua gauzatzen. Euskal ikaskuntzei dagozkien master eta graduatu-ondoko programak sortu eta gauzatzeko ere lankidetzapolitika bultzatuko dute erakunde biek.

Hitzarmenak jasotzen dituen

helburuak bideratzearren, EHUk eta Eusko Ikaskuntzak jarraipen batzorde bat eratuko dute, bi erakundeetako hiruna lagunek osaturikoa.

Gregorio Monrealen aburuz, atzokoa «aktu bat gehiago besterik ez da elkarlaguntza kate baten baitan». Goirienak bezalaxe, Monrealek EHU Euskal Herriko unibertsitate bakarra ez dela nabarmendu zuen, eta Hegoaldeko zein Iparraldeko beste unibertsitateekin antzeko akordioak lortzea garrantzizkotzat jo zuten. Unibertsitatea gizartera hurbiltzea ere beste helburu bat da.

Gaurko unibertsitate sistemaren eta Eusko Ikaskuntzaren arteko lotura sakona azpimarratu zuten hitzarmena sinatu zutenek. Goirienak EHU «Eusko Ikaskuntzaren seme» dela nabarmendu zuen.

Egun hauetako ikastaroetan gizarte zientzietako gaiak jorratuko dira

P.C.S. / DONOSTIA

Atzo egin zuten Miramar jauregian aste honetan egiten ari diren bost ikastaroren aurkezpena. Aste honetako ikastaroetan gizarte zientziak nagusitzen dira eta horien artean nabarmenki nazioarteko politika eta letren arloak.

«Euskara biziberritzeko saioak» izenburua duen ikastaroak Joshua Fishmanek egindako ereduaren arabera herri honetan eman diren urratsak aztertuko ditu. Euskal Herriko hizkuntzaren normalizazio prozesuan egindakoa aztertu eta etorkizunerako ildoak proposatuko dituzte zenbait arlotako adituek. Miren Azkarate euskaltzainak

euskararen kalitateari buruzko hitzaldia emango du gaur ikastaro horren barnean.

«Gerra irudiak Euskal Herriko idazleengan» ikastaroaren bidez omenalditxoak egin nahi izan diete antolatzaileek mende honetako azken gerretan parte hartu zuten euskaldunei, «gerren kroniketan ahaztuak garelako euskaldunok». Euskal Herriko idazleek batez ere II. Mundu Gerran eta Gerra Zibilean idatzitako obrei hurbilduko zaie ikastaro hau filosofia, historia eta literatura ikuspuntutik. Besteren artean, Bernardo Atxagak bi hitzaldi emango ditu bihar gai hauek jorratuz.

«Hamarkada sortzailea: kultura eta gizarte zibila Euskal He-

rrian» ikastaroak 60ko hamarkadan Euskal Herrian gertatu ziren gertaera kulturalak aztertuko ditu. Euskal sortzaileek berrikuntza eta abangoardiaren alde egin zuten apustua aztertuko da, funtsezkotzat jotzen baita epe hori arte garaikidea ulertzeko. «Ez dok amairu», Aresti eta Mitxelena obrei gainbegiratu emango zaie.

«Lurrarentzako politika bat» ikastaroan mendebaldeko ongizatearen eredu mundu osora zabaltzeko ala ez aztertuko dute.

Nazio Batuen berrogeita hamar urteetan nazioarteko gizarteak izan dituen aldaketak aztertuko dituzte atzo aurkeztutako bosgarren ikastaroan.

Surflarien protesta Angelun saio nuklearrak salatzen

L. ETXEHARRETA / ANGELU

Angeluko Urrezko Hondartzan berrehun surflari bildu ziren Surf rider foundation-en deia erantzunez. Minutu batez itsasertzean etzan ziren Frantziako Moruroan arma nuklearrekin hasi behar dituen saioen salaketa egiteko. Ezohizko ekintza bake-tsuak jendearen interesa piztu zuen.

Angeluko hondartzak omen handikoak dira surflarien artean, eta nazioarteko jende salda hor gaindi dabil urtean zehar kirol ikuskariaren praktikatzeko. Hondartza horren baliatzea protesta ekintzaren burutzeko, hortik datorke ere.

Egurdian bildu ziren, beren taulek marraztu munduko bakezaleen ikurraren inguruan. Banderola batzuk ziren ere, bomba atomikoaren salaketa zekartenekin. Azken aste hauetan hedatua den eslogana bazegoen ere, «The endless connerie» (betiko pitokeria). «The endless summer» (betiko uda), surflariak modan jarri zuten filmaren titularen parodia erabiltzen da hor.

Gibus de Soultrait, Miarrizteko itsas eta ur ingurugiroen babes elkarten animatzaileak hitza hartu zuen egun horren unibertsaltasuna eta erranahiak errepikatuz. Kalifornian, Australian eta beste toki askotan, ordu berean egin protesta aipatu zuen, erantzun baketsua goretziz.

Franck Tabaste Frantziako Surf Rider Foundationeko ordezkariak ekintza hori «Moruroako saio nuklearren aurkako ekintzetarik bat bai-zik ez dela baina bere garrantzia duela» agertu zuen. «Manifestazioek saio horiek betiko gelditu arte, protestak egingo ditugu», adierazi zuen. Surflarien partaidetza ekintza horietan azaldu zuen, «Polinesia surfarentzat gune premiazkoa» delako. Ekintza hori «ez dela politika» zioen, «guk nahi duguna hau da: horiek gure guneak ez zikintzea».

Angeluko ekintzaren garrantzia azpimarratu zuten antolatzaileek, beren poza agertuz bildu zen jendetzagatik. Surflariak ere ekintzak egin zituzten Aturriko ur kutsadurak salatzen.



aizu!ren harpidedun izan nahi dut!

Izen abizenak.....
Helbidea.....Tnoa.....
Herria.....Herrialdea.....P.K.....
Bankua.....
Sukurtsal zk.....Kontu zk.....

Urte osorako harpidetza: Hego Euskal Herria, 6.300 pta. Ipar Euskal Herria, 11.300 pta. Atzerria, 11.300 pta.
Diputazio kalea, 3 - 1.goa. 48009 Bilbo.
Tnoa. 94-423 15 52